



Broj: 01/1-50-1-1-10/07  
Sarajevo: 19.4.2007.

**Z A P I S N I K**  
**sa 10. sjednice Ustavnopravne komisije – međunarodne aktivnosti**

Sjednica je održana **19.4.2007.** godine s početkom u **14,15** sati.

Sjednici su prisustvovali članovi Ustavnopravne komisije Predstavničkog Doma PSBiH: **Lazar Prodanović, Momčilo Novaković, Ekrem Ajanović, i Martin Raguž**, kao i članovi Ustavnopravne komisije Doma Naroda PSBiH: **Rudo Vidović i Zoran Koprivica**.

Članovi Ustavnopravne komisije Predstavničkog Doma PSBiH **Šefik Džaferović, Slavko Matić, Drago Kalabić, Halid Genjac** kao i sekretar Ustavnopravne komisije **Milan Zjajić** nisu bili prisutni na sjednici komisije iz opravdanih razloga.

Pored članova Ustavnopravne komisije Predstavničkog Doma i Doma Naroda PSBiH, sjednici su prisustvovali članovi delegacija frakcije CDU Parlamenta Pokrajine HESSEN –a, koju čine: Dr. Christean Wagner - predsjedatelj frakcije, član Pokrajinskog parlamenta, Šef delegacije; Norbert Kartmann - predsjednik Pokrajinskog parlamenta; Volker Hoff - državni tajnik, Michael Brandt - član Bundestaga; Dr. Peter Lennert – član Pokrajinskog Parlamenta i glasnogovornik za pitanja Europe; Aloys Lenz – član Pokrajinskog Parlamenta; Gottfried Milde – član Pokrajinskog Parlamenta; Birgit Zeimetz-Lorz – član Pokrajinskog Parlamenta; Michael Demel - zvaničnik, referent frakcije CDU

Sjednici su prisustvovali i pripravnik Đenita Pašić zaposlena u Sekretarijatu PS BiH i student stažista Ajdin Brčaninović.

Gospodin Martin Raguž je pozdravio i poželio dobrodošlicu delegaciji frakcije CDU i istakao kako je njihova posjeta za BiH veoma značajna prvenstveno jer Njemačka trenutno predsjedava EU. Zatim je predstavio članove Ustavnopravnih komisije oba Doma PSBiH.

Nakon toga je Dr. Cristean Wagner zahvalio na dobrodošlici u ime pokrajine Hessen i predstavio članove delegacije frakcije CDU. Između ostalog istakao je kako je Visoki Predstavnik Christian Schwarz - Schilling dugo vremena predstavljao njihove interese u Saveznoj Republici Njemačkoj i Parlamentu, kako je i on bio član CDU u Pokrajinskom Parlamentu u Hessenu, kao i to da je u toku rata u BiH veliki broj izbjeglica našao utočište u Njemačkoj i kako je Njemačka i zbog toga jako naklonjena BiH i želi da pomogne BiH na njenom putu ulaska u EU. Zatim je rekao kako danas žele da diskutuju o tome kako izgleda taj put koji treba da BiH vodi u EU.

Martin Raguž je istakao da bi se trebali dogovoriti koraci za buduću saradnju te kako je važno imati kontinuitet susreta i komunikacije. Naveo je i to da je prošlom mandatu realizirana posjeta Predsjednika Bundestaga te kako je gospodin Raguž predvodio četverodnevnu posjetu Berlinu i Dresdenu i kako je sve to ostavilo pozitivan utisak na njega. Spomenuo je i to da je BiH sastavljena od dva Entiteta i tri konstitutivna naroda što je definirano Aneksom IV Opšteg Okvirnog sporazuma za BiH, koji je zaustavio težak rat i kataklizmu u BiH, te kako je veliki broj stanovnika otišao u Njemačku i zahvaljuje se na svemu što su oni učinili za izbjeglice. Zatim je naveo da je Dejton otvorio mogućnost mira i izgradnje i da je on istorijski akt koji je donio puno pozitivnog ali isto tako da je Dejtonski

sporazum u nekim segmentima ostao limit za dalji razvoj BiH i njeno brže integrisanje u EU. Rekao je i to da je BiH u procesu provođenja reformi od kojih su značajne reforme odbrane, finansija, pravosuđa, te da su neke od nadležnosti Entiteti prenijeli na državni nivo i da je trenutno fokus na ustavnim reformama i reformama policije, te kako je reforma policije zadnji preduslov za pridruživanje BiH EU i da vjeruje da će BiH sada, kada je vlast formirana, imati značajne iskorake u toj oblasti, jer u prošlom mandatu prijedlog za promjenu Ustava nije dobio dvotrećinsku većinu u Predstavničkom Domu PSBiH te kako smatra da će sadašnja vlast imati snage da napravi politički konsenzus po tom pitanju.

Nakon toga je riječ uzeo gospodin Michael Brandt koji je istakao da je prvi put u Sarajevu na novoj funkciji (inače je studirao u Sarajevu) i želio bi sve prisutne upoznati s tim da je prije četiri sedmice u Bundestagu osnovana njemačko-bosanskohercegovačka Parlamentarna grupa i da je on predsjedavajući te grupe.

Momčilo Novaković je nakon pozdrava i zahvale na njihovom dolasku, rekao kako u BiH ima još uvijek puno strahova i mnogo neispunjenih uslova i pored dobre volje svih, te kako je zbog toga potrebno njihovo strpljenje i lobiranje da bi BiH ispunila te uslove te da pomognu BiH na putu ka EU. Naveo je i to da nije uvijek lako ispuniti sve te uslove, prvenstveno zbog problema unutar BiH, a i zahtjeva EU.

Lazar Prodanović je takođe izrazio zadovoljstvo i ispred SNSD-a podržao inicijativu gospodina Brandta za stvaranje njemačko-bosanskohercegovačke grupe u njihovom Parlamentu te izrazio želju da se i u PSBiH osnuje prijateljska bosanskohercegovačko-njemačka grupa. Takođe želi da s razmijene iskustva koja će pomoći oko ključnih pitanja kao što su reforma policije, obrazovanja, Ustava.. Rekao je i to kako Njemačka treba da ima interes da investira u BiH što bi doprinjelo političkoj stabilnosti, te da podrže BiH u procesu olakšanja viznog režima naročito oko razmjene studenata.

Ekrem Ajanović je istakao da mu je čast prisustvovati ovoj sjednici, te kako je on naročito vezan za Njemačku jer je njegov brat bio prvi ambasador BiH u Njemačkoj te kako je preko njega a i na druge načine upoznat s tim koliko je Njemačka pomogla BiH na čemu se iskreno zahvaljuje. Napomenuo je i to kako njegov grad Tešanj više od 50 godina jako dobro saraduje sa Njemačkom i to sa Mercedesom, Wolksvagenom i BAM filterima i kako je ta saradnja nastavljena i nakon rata. Naveo je još da Njemačka može pomoći BiH da se promijeni “uska košulja koja joj je napravljena” a to je Ustav, i da je to najveća prepreka za reforme i ulazak BiH u EU, te kako je u Ustavu napravljena velika “nakarada” po pitanju donošenja zakona te da je teško donijeti bilo kakav zakon, pa čak i takav koji nema veze sa Entitetima, nacionalnostima i dr. Npr. Zakon o radijacijskoj i nuklearnoj sigurnosti već 5 godina ne može da se donese a to je sve rezultat načina glasanja u Predstavničkom Domu PSBiH, i nijedna država, da ima takav Dom ne bi mogla donijeti zakon bez obzira da li je imala rat ili nije. Zatim je rekao da za napredak nakon rata najviše se može zahvaliti međunarodnoj zajednici i ključu da Visoki Predstavnik može nametnuti zakon te da OHR ne bi trebao da bude zatvoren prije konačnog rješenja pitanja Ustava i kako se nada da će BiH u tome pomoći i EU i Njemačka koja joj predsjedava.

Rudo Vidović je, zbog nedostatka vremena, istakao samo dvije stavri, a to je da želi što ranije da se BiH pridruži EU te da su svi svjesni da BiH u reformskim procesima mora uraditi svoj dio posla ali isto tako da se očekuje međunarodna pomoć te da su ovakvi razgovori od koristi i da sa nestrpljenjem u BiH čekaju da im se pridruže.

Zoran Koprivica se takođe zahvalio na dolasku delegacije frakcije CDU i na razumijevanju problema BiH. Takođe ih je upoznao sa ustrojstvom BiH i njenom sastavu te kako je BiH održiva samo ako je svi narodi osjete kao svoju i budu potpuno ravnopravni. Istakao je i to da je rat ostavio teške posljedice za BiH kao i to da su ljudi ovdje živjeli u zajedničkoj državi koja se raspala i koja je imala prilično uređen društveno – politički sistem, a sada je u državi 50% nezaposlenih stanovnika, platni deficit od 7 milijardi KM a tu su i mnogi drugi problemi u funkcionisanju Institucija ali i da se sve to može prevazići uz poštivanje principa ravnopravnosti naroda, Dejtonskog Sporazuma i Ustava BiH i da BiH od Njemačke očekuje da razumije unutrašnje probleme s kojima se BiH susreće i da saraduje sa Institucijama BiH. Napredak od 1996. godine do danas je rezultat kooperativnosti Zastupnika iz

Parlamentarne Skupštine BiH i Međunarodne zajednice. I sve što je gospodin Ajanović istakao moglo bi se i drugačije komentarisati i imajući u vidu strahove o kojima je gospodin Novaković govorio zbog reformi koje nisu u interesu sva tri naroda u BiH.

I na kraju se obratio gospodin Brandt koji je rekao da je interes Bundestaga da se ne jačaju Entiteti nego treba da se jača državni nivo i u tom području postoji interes da se zajednički jača Parlament BiH kako bi BiH zajednički pošla u napredak te kako BiH ne treba ostati crna fleka u Europi.

Gospodin Raguž je završio sjedncu riječima da BiH ima ljude, resurse i sve što je potrebno te da je vrijeme za harmonizaciju a ne za konfrontaciju.

Sjednica je završena u 15,45 sati.

DRUGI ZAMJENIK  
PREDSJEDAVAJUĆEG KOMISIJE  
**Martin Raguž**